

vnd noch etwas drüber / warin vnd trucken  
ist / seine Kälte vnd Feuchtigkeit bemeinen :  
d̄ also das Bier / zu Erhaltung des Mensch-  
lichen Lebens / gar eine liebliche gesunde Cor-  
respondenz vnd Verwechselung der Quali-  
teten bringet.

Man muß aber zum Bierbrauen das al-  
lerbeste Getränk nehmen / das wol reiff ist  
worden/ fein volle dicke Körner hat/ in trucke-  
nem Wetter eingesamlet/an bequemen Or-  
ten trucken gelegen/vnd recht aufgedorret ist.  
Das beste Wasser zum Bier ist Brunnen-  
Wasser/Fliessendwasser/Regenwasser/vnd  
bißweilen auch das Wasser/so auß den Seen  
geschöppet wird / sonderlich wenn es fein lau-  
ter vnd rein ist / vnd zu trincken taug. Der  
Hopffe soll fein flebend seyn/ vnd ein guten  
starcken Geruch haben/ der wol gelegen vnd  
recht verwahret ist/ daß nicht Lufft oder Re-  
gen zu ihm kommen kan. Dann ein solcher  
Hopffe bringet gut Bier / eröffnet das ver-  
stopfte/reiniget das Geblüt/hindert alle Feu-  
lung im Leib/vn treibet die Biliosische Feuch-  
tigkeiten auß. Dieser muß auch recht vñ lang  
gnug im Bierbrauen gesotten werden: vnd  
stehet hierinnen die ganze Kunst des Bier-  
brauens: da muß man auch zusehen / vnd  
fleissig mercken / wie lang ein jeder Hopfen  
das nieden leiden vnd außstehen kan / daß er  
nicht zu rohe bleibe / auch nit im vbrigen sie-  
den seine natürliche Krafft verliehre. Und  
muß diese Kunst an einem jeden Orth fast  
anders gelernt werden/ dann jedes Land sei-  
ne sondere Art vnd Eigenschaften hat: So  
muß man auch Achtung auff die Zeit vnd  
Qualitetten der Lufft geben/dann wann man  
brauen will/ so muß es nicht zu kalt vnd nicht  
zu warm seyn/ ist's zu kalt/so friert die Gerste/  
ist's zu warm / so schlegt der Sommer in die  
Fass/vnd wird das Bier leichtlich sawer. Wir  
solten hier auch weitleufig von dem unter-

schied der Bier schreiben / von iherer vielfaltigen Kraft vnd Wirkung / weilen aber solches andere vornehme gelehrte Leuth vorhin gethan / wollen wir den Leser oder Zuseher dorthin gewiesen haben / vñ vns vnter dessen nach andern Leuthen vimbsehen.

## ANNOTATIO.

Von Kochen findet man etwas bey Alexandro ab Alexandr. libr. 5. Dierum Genialium, cap. 20. Desgleichen bey Rhodigno, lib. 15. cap. 18. Item bey Petro Crinito, libr. 6. de Honesta disciplina, cap. 4. vnd mag man das sechste Buch Iohannis Thomae Phrigii de Coquinaria hierzu lesen.

• ପାତ୍ରିକା • ପାତ୍ରିକା • ପାତ୍ରିକା • ପାତ୍ରିକା • ପାତ୍ରିକା •

## Vier vnd neunzigster Discurs.

# Bon Mäurern vnd Weissbenderff.

**S**e Mäurerkunst hat/wie Vitruvius  
in seiner Architectura vermeint/  
einen solchen Anfang gehabt/nem-  
lich / nach dem die Menschen das Feuer er-  
funden/ vnd die Nutzbarkeit desselbigen ver-  
mercket/haben sie allgemein angefangen sich  
zusammen zuthun/ vnd mit einander nach  
Notturfft zu handeln/ alda etliche angefangen  
Hütten von Reisern zu bawen/vnd die auch  
mit Reisern / oder Gras / zu bedecken: etliche  
als sie gesehen/ daß sie vnter solchen Hütten  
nicht gnugsam verwahret/ haben Löcher vnd  
Höhlen in die Berge gegraben/wie man noch  
auff den heutigen Tag etliche findet / sonder-  
lich bey den Trogloditis, die in dergleichen  
Hölen wohnen: dieweil sie sich aber auch da-  
rin nit zum besten befunden/ haben sie ange-  
fangen